

Na osnovu člana 16. stav (4) Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10) Vlada Zeničko-dobojskog kantona, na 155. sjednici održanoj 20.08.2018. godine, d o n o s i

ZAKLJUČAK

I

Utvrđuje se Prijedlog Zakona o izmjenama i dopunama Zakona o nabavljanju, držanju i nošenju oružja i municije.

II

Prijedlog Zakona iz tačke I ovog Zaključka se upućuje u dalju skupštinsku proceduru.

III

Zaključak stupa na snagu danom donošenja.

Broj: 02-_____/18.
Datum 20.08.2018. godine
Z e n i c a

PREMIJER

Miralem Galijašević

DOSTAVLJENO:

1x Stručna služba Skupštine,
1x Stručna služba Vlade,
1x Ministarstvo unutrašnjih poslova,
1x a/a.

Na osnovu člana 37. stav 1. tačka f) Ustava Zeničko-dobojskog kantona Skupština Zeničko-dobojskog kantona, na ____ sjednici održanoj dana __. __. 2018. godine, d o n o s i

ZAKON
O IZMJENAMA I DOPUNAMA ZAKONA O NABAVLJANJU, DRŽANJU I NOŠENJU
ORUŽJA I MUNICIJE-PREČIŠĆENI TEKST

Član 1.
(Dopuna člana 6.)

U Zakonu o nabavljanju, držanju i nošenju oružja i municije – Prečišćeni tekst („Službene novine Zeničko-dobojskog kantona“, broj: 9/13 i 1/14), u članu 6. stav (1) iza tačke nn) tačka se zamjenjuje zarezom i dodaje nova tačka oo) koja glasi:

"oo) airsoft i paintball naprave su puške i pištolji, odnosno sportski rekviziti namijenjeni izbacivanju plastičnih, gumenih ili želatinoznih projektila na isti način kao i vazdušno oružje, s tim da mogu imati veći kalibar od navedenog i mogu raditi u automatskom režimu i da je energija projektila manja od energije navedene za pojam vazdušnog oružja."

Član 2.
(Dopune člana 6a.)

U članu 6a. stav (1) Kategorija C iza tačke 4) na kraju teksta tačka se zamjenjuje zarezom i dodaju nove tačke 5) i 6) koje glase:

"5) vazdušno oružje čija je kinetička energija 10,5J ili veća ili je brzina projektila 200m/s ili veća i kalibra većeg od 4,5mm,

6) oružje sa tetivom čija je sila zatezanja tetive veća od 450 N, odnosno čija je natezna težina veća od 101 libre."

U Kategoriji D tačka 1) iza riječi "oružje" dodaje se sljedeći tekst:" čija je kinetička energija manja od 10,5J ili je brzina projektila manja od 200m/s i kalibra 4.5 mm i manjeg.", a u tački 4) iza riječi "tetivom" dodaje se sljedeći tekst:" čija je sila zatezanja tetive manja od 450 N, odnosno čija je natezna težina manja od 101 libre."

Član 3.
(Izmjene i dopune člana 6b.)

U članu 6b. stav (1) u tački c) alineja 2) i 3) se brišu, a dosadašnje alineje 4) i 5) postaju alineje 2) i 3).

U tački d) alineja 1) na kraju teksta tačka se zamjenjuje zarezom i dodaju nove alineje 2) i 3) koje glase:

"2) vazdušno oružje čija je kinetička energija manja od 10,5J ili je brzina projektila manja od 200m/s i kalibra 4.5 mm i manjeg i

3) oružje s tetivom čija je sila zatezanja tetive manja od 450 N, odnosno čija je natezna težina manja od 101 libre."

U stavu (4) riječi:" vazdušnog oružja, oružja s tetivom," se brišu.

Član 4.
(Dopuna člana 9c.)

U članu 9c. stav (1) tačka b) alineja 4) iza riječi "obuci" tačka se zamjenjuje zarezom i dodaje nova alineja 5) koja glasi:

"5) za lica koja su imala registrovano vatreno oružje, potvrdom/uvjerenjem nadležne policijske stanice kod koje je imao registrovano oružje."

Član 5.
(Izmjena člana 11.)

U članu 11. stav (1) tačka b) riječi " odgovorno lice i" se brišu.

Član 6.
(Izmjena člana 11a.)

Član 11a. mijenja se i glasi:

"Član 11a.
(Nabavljanje municije)

- (1) Municija za oružje iz kategorije B može se nabavljati na osnovu oružnog lista i odobrenja za držanje oružja.
- (2) Municija za oružje iz kategorije C i vazdužno oružje iz kategorije D može se nabavljati na osnovu potvrde o prijavi.
- (3) Municija za lovačko i sportsko oružje može se nabavljati na osnovu odobrenja za držanje oružja, odnosno na osnovu dokaza o upisu u sudski registar.
- (4) Municija se može nabavljati samo za vrstu oružja za koju lice ima važeću ispravu o oružju, izuzev streljačkih organizacija koji mogu nabavljati različitu municiju za svoje potrebe i potrebe obuke.

Član 7.
(Izmjena člana 13.)

U članu 13. stav (1) iza broj 10. briše se zarez i dodaje veznik "i", a riječi " i 11a." se brišu .

Član 8.
(Izmjene člana 16.)

U članu 16. stav (1) se briše.

U stavu (2) tačka se briše i dodaju sljedeće riječi:" iz kategorije D."

U stavu (3) riječi:" i (2)" i riječi:" ,osim oružja s tetivom," se brišu.

U stavu (6) riječi:" i (2)" se brišu.

Dosadašnji stavovi "(2), (3), (4), (5), (6) i (7)" postaju stavovi "(1), (2), (3), (4), (5) i (6)".

Član 9.
(Izmjena člana 31.)

U članu 31. stav (1) riječ "može", zamjenjuje se tekstem " kao i njihovi članovi mogu".

U stavu (4) iza riječi " od organizacija "dodaju se riječi" ili članova".

Član 10.
(Novi dio ČETVRTI A i novi članovi 39a.,39b.,39c.,39d. i 39e.)

Iza "DIO ČETVRTI" dodaje se novi dio "DIO ČETVRTI A - CIVILNA STRELIŠTA" i novi članovi "39a.,39b.,39c.,39d. i 39e." koji glase:

"Član 39a.
(Uvjeti za osnivanje civilnih strelišta)

- (1) Civilna strelišta za obavljanje sportske i druge djelatnosti mogu osnovati pravna lica i obrtnici koji prije upisa u sudski registar, odnosno registar radnji, za to dobiju odobrenje nadležne policijske stanice i nadležnog organa iz oblasti prostornog planiranja i urbanizma kojom se odobrava lokacija civilnog strelišta.
- (2) Odobrenje iz stava (1) ovog člana nadležna policijska stanica će izdati ako:
 - a) su ispunjeni prostorni i tehnički uvjeti za smještaj i čuvanje, kojima se obezbjeđuje da oružje i municija ne dođu u posjed neovlaštenih lica i ne ugroze bezbjednost ljudi i objekata.

- b) lice koje neposredno rukuje oružjem u pravnom licu, odnosno obrtnik ispunjava uvjete iz člana 8. stav (2) i (3) ovog zakona i
 - c) pravno lice i obrtnik ima pravo vlasništva ili pravo korištenja objekta (otvorenog i/ili zatvorenog) i poslovnog prostora koji će biti u funkciji civilnog strelišta.
- (3) Dokazivanje prostornih i tehničkih uvjeta se vrši odgovarajućom upotrebom dozvolom za strelište koju izdaje nadležni organ iz oblasti prostornog planiranja i urbanizma.
- (4) Pravna lica i obrtnici iz stava (1) ovog člana obavezni su da, u roku od osam dana od dana upisa u sudski registar, odnosno registar radnji, obavijeste nadležnu policijsku stanicu o upisu u registar.
- (5) Odredbe ovog zakona ne primjenjuju se na lovačka strelišta koja se upotrebljavaju za gađanje i isprobavanje lovačkog oružja svojih članova prema propisima o lovstvu.

Član 39b.

(Utvrđivanje uvjeta za osnivanje civilnih strelišta)

- (1) Postojanje uvjeta iz člana 39a. ovog zakona utvrđuje komisija iz člana 40. stav (6) ovog zakona.
- (2) Izvještaj o utvrđenom stanju komisija dostavlja rukovodiocu policijske stanice koji donosi rješenje o odobrenju.
- (3) Protiv rješenja iz stava (2) ovog člana može se izjaviti žalba policijskom komesaru u roku od 15 dana od dana prijema rješenja.

Član 39c.

(Upotreba oružja na civilnom strelištu)

Pravno lice i obrtnik, odnosno osobe koje rukuju oružjem i municijom i upravljaju civilnim strelištem, dužni su poduzeti mjere i radnje na održavanju reda na civilnom strelištu i to da:

- a) vatreno oružje na civilnom strelištu može koristiti fizičko lice kojem je izdata odgovarajuća isprava o oružju,
- b) fizičko lice koje ne ispunjava uvjete iz tačke a) ovog člana, gađanje može izvoditi samo pod nadzorom ovlaštenog lica osnivača civilnog strelišta i isključivo s oružjem i municijom koja je vlasništvo osnivača civilnog strelišta.
- c) članovi sportskih streljačkih organizacija, uz predočavanje odgovarajućeg dokaza o članstvu, mogu na civilnom strelištu koristiti vatreno oružje i municiju koji su vlasništvo sportskih streljačkih organizacija, kao i oružje i municiju koji su vlasništvo osnivača civilnog strelišta.
- d) zabrani pristup i izvođenje licima iz tačke a), b) i c) ovog člana, ako njihovo ponašanje ukazuje da su pod dejstvom alkohola, opojnih droga ili drugih omamljujućih sredstava, odnosno da su u takvom stanju da nisu u mogućnosti shvatiti značenje svog postupanja, odnosno vladati svojom voljom.

Član 39d.

(Nabavka oružja i municije za potrebe civilnog strelišta)

Pravna lica i obrtnici iz člana 39a. ovog Zakona mogu nabavljati oružje i municiju radi gađanja na civilnom strelištu na način propisan ovim Zakonom.

Član 39e.

(Primjena odredaba ovog zakona)

Pravna lica i obrtnici iz člana 39a. ovog zakona, dužni su u roku od devet mjeseci od dana stupanja na snagu ovog zakona uskladiti svoj rad sa odredbama ovog zakona."

Član 11.

(Izmjena člana 42.)

U članu 42. stav (2) u tački a) i b) riječi "i municije" se brišu.

Član 12.
(Izmjene i dopune člana 56.)

U članu 56. stav (1) tačka b) riječi : " i municije" se brišu.

Iza stava (2) dodaje se novi stav (3) koji glasi:

Novčanom kaznom od 1.000,00 KM do 5.000,00 KM kaznit će se za prekršaj pravno lice i obrtnik koji:

- a) osnuju civilna strelišta bez odobrenja nadležne policijske stanice i nadležnog organa iz oblasti prostornog planiranja i urbanizma kojom se odobrava lokacija civilnog strelišta (član 39a.),
 - b) postupi protivno odredbama člana 39c. ovog zakona,
 - c) u propisanom roku ne uskladi svoj rad u skladu sa odredbama ovog zakona (član 39e.),
 - d) u propisanom roku ne obavijesti nadležnu policijsku stanicu o upisu u sudski registar, odnosno registar radnji (član 39a. stav (4)),
- Dosadašnji stav (3) i (4) postaju stav (4) i (5)".

Član 13.
(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Zeničko-dobojskog kantona".

Broj:
Datum,
Zenica

PREDSJEDAVAJUĆI SKUPŠTINE

Jasmin Duvnjak

Obrazloženje

I – PRAVNI OSNOV

Izmjene i dopune Zakona o nabavljanju, držanju i nošenju oružja i municije Zeničko-dobojskog kantona -Prečišćeni tekst („Službene novine Zeničko-dobojskog kantona“, broj: 9/13 i 1/14) se vrše na osnovu člana 37. stav (1) tačka f) Ustava Zeničko-dobojskog kantona.

II – RAZLOZI ZA DONOŠENJE ZAKONA

Zakon o nabavljanju, držanju i nošenju oružja i municije Zeničko-dobojskog kantona - Prečišćeni tekst objavljen je u „Službenim novinama Zeničko-dobojskog kantona“, broj: 9/13 i 1/14.

Donošenju Zakona o izmjenama i dopunama Zakona o nabavljanju, držanju i nošenju oružja i municije pristupilo se na inicijativu poslanika u Skupštini Zeničko-dobojskog kantona gosp. Plančić Ibrahima i Handžić Hasana.

Inicijativa Plančić Ibrahima podrazumijeva izmjene Zakona o nabavljanju, držanju i nošenju oružja i municije-Prečišćeni tekst, u smislu da se:

- a) izmijeni član 11a. na način da se municija za kratko vatreno oružje može nabavljati na osnovu važećeg oružnog lista bez odobrenja i bez ograničenja količine municije,
- b) da se briše član 17. obzirom da snajper nije oružje već optički nišan,
- c) da se u članu 9c. stav (1) tačka b) doda alineja 5. koja će glasiti " za lica koja su posjedovala registrovano kratko vatreno oružje, potvrdom/uvjerenjem nadležnog organa kod kojeg je posjedovao registrovano oružje", i
- d) da se članovi 37. i 39., a u vezi sa članom 8. dodatno usklade sa odredbama Zakona o prekršajima i Zakona o krivičnom postupku u F BiH u smislu definisanja koji su to prekršaji i krivična djela (teži lakši; da li je prouzrokovana veća ili manja šteta njihovim činjenjem; jesu li za počinjenje istih kažnjeni ili im je izrečena sankcija pod uvjetom i sl.).

Ministarstvo unutrašnjih poslova Zeničko – dobojskog kantona je podržalo inicijativu za izmjene i dopunu Zakona o nabavljanju, držanju i nošenju oružja i municije-Prečišćeni tekst ("Službene novine Zeničko-dobojskog kantona", broj: 9/13 i 1/14) pod alinejama a) i c), a nije podržalo inicijativu pod alinejama b) i d).

Inicijativom Handžić Hasana se predlaže regulisanje korištenja vatrenog oružja u smislu komercijalnog i turističkog lova stranaca na području Zeničko-dobojskog kantona, koju je ovo Ministarstvo podržalo.

Nakon detaljne analize teksta Zakona, Ministarstvo unutrašnjih poslova je kao obrađivač teksta pripremilo i predložilo izmjene i dopune kao u tekstu Zakona.

III – PRAVNA RJEŠENJA

Izmjene i dopune zakona od prihvaćenih inicijativa vrše se iz sljedećih razloga:

- **U odnosu na Nacrt zakona u prijedlogu zakona u članu 1. (dopuna člana 6.) propisana je nova tačka oo) kojom su definisane airsoft i paintball naprave imajući u vidu činjenicu da dosadašnje odredbe zakona nisu poznavale ovakvu vrstu oružja čije korištenje je sve prisutnije na području cijele Bosne i Hercegovine pa i ovog kantona i koje se koriste u rekreativne svrhe.**
- **U odnosu na Nacrt zakona u članu 2. (dopune člana 6a.) u članu 6a KATEGORIJA C dodaju su nove tačke 5) i 6) koje preciznije propisuju šta je to vazdušno oružje i oružje s tetivom koje se mora prijaviti nadležnoj Policijskoj**

stanici. U vazdušno oružje opisano u tački 5) spadaju i airsoft i paintball naprave koje su uvrštene u odredbe ovog zakona. U istom članu u KATEGORIJI D izmjenjena je definicija vazdušnog oružja i oružja s tetivom koje se neće morati prijavljivati nadležnoj Policijskoj stanici.

- U odnosu na Nacrt zakona izmjene i dopune u članu 3. (izmjene i dopune člana 6b.) su rezultat dopuna izvršenih u članu 2. (dopune člana 6a.) čime je vazdušno oružje i oružje s tetivom svrstano u odgovarajuću kategoriju oružja u smislu određivanja potrebnih dozvola za nabavku takvog oružja.

- Predložena dopuna u članu 4. zakona, se odnosi na lica koja su imala registrovano vatreno oružje po ranije važećim propisima i koja vrše nabavku vatrenog oružja po važećem Zakonu da se oslobađaju polaganja ispita koji se odnosi na pravilno rukovanje oružjem i poznavanjem propisa kojeg provodi Komisija Ministarstva unutrašnjih poslova Zeničko-dobojskog kantona, kao jedan od posebnih uslova predviđenih u članu 8. stav (3) tačka b). Naime, navedena kategorija lica po odredbama zakona koji se mijenja morala je proći obuku s ciljem sticanja tehničkog znanja i vještine za pravilno rukovanje oružjem i poznavanja propisa koji se odnose na držanje i nošenje oružja, što nije bilo potrebno za lica koja su već nekada imala dozvolu i rukovala vatrenim oružjem. Ovom dopunom na ovaj način ova kategorija lica ne bi imala obavezu obuke odnosno polaganja ispita prilikom podnošenja zahtjeva za nabavku ličnog vatrenog oružja.

Izmjena u članu 5. vrši se iz razloga što po važećem zakonu prilikom izdavanja odobrenja za nabavku oružja pravnom licu, odgovorno lice i lice zaduženo za sigurnost u tom pravnom licu mora ispunjavati opće i posebne uslove iz člana 8. Zakona. To je u praksi stvaralo ozbiljne probleme iz razloga što je bilo slučajeva da odgovorno lice u pravnom licu tj. direktor bude predmet istražnih organa ili u nekim slučajevima bude osuđen za krivično djelo ili prekršaj pa zbog toga posljedice trpi pravno lice, odnosno isto se odbija za nabavku vatrenog oružja iako im je zbog prirode poslova za koje su registrovani neophodno vatreno oružje. Pravna lica koja imaju pravo nabavljanja oružja su pravna lica koja su kod nadležnog suda registrovana za obavljanje djelatnosti uzgoja, držanja, čuvanja ili zaštite životinja; upravljanje i gazdovanje šumama; sportskog streljaštva; vođenja civilnih strelišta; naučnog istraživanja za koje je potrebno oružje; muzeji; agencije za zaštitu ljudi i imovine; pravna lica koja imaju uspostavljenu unutrašnju službu zaštite, kao i korisnici lovišta, te se ovom izmjenom predviđa da odgovorno lice u pravnom licu bude oslobođeno obaveze da ispunjava opće i posebne uslove, odnosno ova obaveza se briše. Dakle, samo lice koje je zaduženo za sigurnost u pravnom licu bi moralo ispunjavati pomenute uslove, kako bi dobilo odobrenje za nabavku oružja.

- U članu 6. predložene izmjene podrazumijevaju da fizička i pravna lica, kao i lovačke i streljačke organizacije mogu nabavljati municiju na osnovu izdate isprave o oružju (oružni list, odobrenje za držanje oružja i rješenje o upisu u sudski registar), dakle bez posebnog odobrenja koje je do sada bilo potrebno i bez ograničenja u količini municije ali samo za kalibar oružja za koje im je izdato odobrenje.

- Izmjene predložene u članu 7. su rezultat naprijed izvršenih izmjena, a to znači da se ne može izjavljivati žalba na rješenje kojim je odbijen zahtjev za nabavku municije obzirom da se više i ne traži odobrenje za nabavku municije.

- U odnosu na Nacrt zakona u prijedlogu zakona izmjene u članu 8. (izmjena člana 16.) su posljedica uvođenja i preciznijeg definisanja vazdušnog oružja i oružja s tetivom. Naime, u predmetnom članu propisano je da će se ubuduće vazdušno oružje i oružje iz kategorije C koje ima veći kalibar, a u koje između ostalog spadaju i airsoft i paintball naprave, moći nabavljati fizička i pravna lica uz obavezu prijavljivanja nadležnoj policijskoj stanici. U važećem zakonu vazdušno oružje, dijelove za vazdušno oružje i oružje s tetivom mogli su

nabavljati isključivo sportske streljačke organizacije i njihovi članovi, što predloženim izmjenama neće biti slučaj.

- Izmjene u članu 9. se odnose na to da se fizičkim licima članovima lovačkih organizacija omogući da mogu dati na poslugu svoje lovačko oružje i municiju članovima domaćih i inostranih lovačkih organizacija ukoliko ispunjavaju uslove iz člana 28. stav (2) Zakona.

- U odnosu na Nacrt zakona u prijedlogu zakona u članu 10. izvršena je dopuna novog dijela IV i dodavanja novih članova. Novim članovima zakona propisano su uvjeti za osnivanje civilnih strelišta, zatim ko utvrđuje uvjete za osnivanje civilnih strelišta, kao i upotreba oružja i nabavka municije na civilnim streljštima. U važećem zakonu ova materija nije bila uređena i u praksi je često dolazilo do improvizacije civilnih strelišta čime nije bila osigurana sigurnost građana a i samih korisnika takvih strelišta. Pomenute odredbe su usklađene sa odredbama Zakona o nabavljanju, držanju i nošenju oružja i municije drugih kantona koji su ovo pitanje već ranije riješili.

- Izmjene predložene u članu 11. su rezultat naprijed izvršenih izmjena, a to znači da ovlašteni trgovac nema više obavezu vraćanja odobrenja o prodatoj municiji sa zabilježbom nadležnoj policijskoj stanici, obzirom da će isti prodaju municije vršiti na osnovu oružnog lista i drugih isprava.

- U odnosu na Nacrt zakona u prijedlogu zakona izmjene i dopune u članu 12. (izmjene i dopune člana 56.) su rezultat naprijed izvršenih izmjena i dopuna. Naime, uvođenjem novih članova u zakon koji definišu civilna strelišta, moralo se pristupiti i uvođenjem sankcija za pravna lica i obrtnike koji ne budu postupali u skladu sa odredbama zakona koji definišu civilna strelišta

IV – FINANSIJSKO OBRAZLOŽENJE

Predmetne izmjene i dopuna Zakona o nabavljanju, držanju i nošenju oružja i municije - Prečišćeni tekst ("Službene novine Zeničko-dobojskog kantona", broj: 9/13 i 1/14) ne iziskuju dodatna finansijska sredstva u budžetu Zeničko-dobojskog kantona.

MINISTARSTVO UNUTRAŠNJIH POSLOVA
ZENIČKO-DOBOJSKOG KANTONA

MINISTAR
Nikola Arsenić